



Dins chés tans d'avint, Corbie étoait eune fameuse ville ed Picardie. Ses moésons ales étoètent à ch'pied d'eune bèle abbie pi tout près d'une rivièrre fin tranchille qu'ale s'appelle el Sonme. Un molé pus lon, y avoait eune grinde falise blanque. Ch'étoait eune falise ed cran.

Ch'est aladon que dins eune muche del falise-lo, à part ed chés hommes, y avoait un drole ed gayant. Il étoait grind comme chés plus heuts abes. S'barbe ale étoait fin drute pi ses cavieus pitchés ed brinques d'hour pi d'ronches. Y avoait eune énorme corne d'ivoère qu'ale avoait l'ernommée ed foaire toutes ses pécvaves.



S'y souffloait douchmint eddins s'corne, l'herpe pi chés fleurs poussaient alintour ed li.

S'y souffloait pus fort, chés bétails naissoaient : eune gronnée ed rétus ozieus pi d'bétails del forêt.

S'y souffloait d'un coeup l'herpe ale devnoait ganne pi chés abes perdoaient leus feuilles.



Mais tout sin pouvoèr n'pouvoait rien conte chés gins adou que ch'mau il étoait moète.

Chés gins n'vivoaient equ por avoèr ed l'ergint. Leu tchoeur étoaient matché ed maouais'té pi d'jalous'té.

Ch'gayant tout seu pinsa pi rapinsa bel et longtims à quoé qui porroit foaire conte ch'mau-lo.



Y s'est iniqué dins chés bos pi il o eu idée d'ingénieur un monne qu'avuc des éfants fin rétus.

Il o jué du cor si douchmint equ chés nazus naissoaient fin drus dins un poéyis rimplis ed biefs gardins. Chés patures ales étoètent fleuries pi chés nazus y avoaient eune vie toute douce. Ch'poéyis avoait un sintiboin ed bieuté pi ed djaité. Y n'avoait pon d'plache por chés meudiries avuc ed tels éfants cancheus.



Mais ch'est aladon, equ chés jonnes, in grindissant, y perdoaient leur innocinche.

Ils étoaient adon maouais pi invieus. Leus jux étoaient inchpés ed maouaiseté pi d'haine.

Ch'gayant il étoait ragrigné.



Il o comminché à braire pi ses lèrmes ales ont coulés in titiots ruisseus.

Chés cornailles ales ont intamé eune noèrté ronde par edssus ch'poéyis.


Mais chés maoués éfants n'avoient mie soin dech mau à ch'gayant. Is étoètent inforchés à s'chamailer tertous insanne.

Ch'gayant y s'o mit à braire pi à braire qu'à forche chés ruisseus is faisoètent des rios.



Chés rios faisoètent des rivières pi chés rivières des verses du diabe.

Pi meume qu'el Sonme, qu'ale étoait fin tranchille d'ordinaire, ale s'o mit à déborder pi inieuer toute el planne. Chés moésons étoètent sous l'ieu pi gramint d'éfants ont défunctés.



Adon, no gayant s'o arrêté ed braire pi il o soufflé dins s'corne d'ivoère un tortuwarak qu'il o séqui ch'grind flot. El terre ale étoait sèque.

Chés récapés n'volòètent pon erconnoaite equ tous chés malheurs-lo étoètent ed leu feute.



Is ont ieu idée d'aller déroufler el corne dech gayant. Ergrand ed ses brairies, il deurmoait pindint des eures pi des eures avec es corne magique par indsous s'tête.

Is sont vnus à li.

Mais inchépé por déroufler el corne, is ont foait un treu eddins.



Ch'est aladon qu'un tortuwarak ed pourète pi d'sabe o noèrchi chés cius.

Tout ch'poéyis il étoait prind avec el timpête. Cha n'o mie réveiller ch'gayant.



Achteure, on intind mie pus el corne d'ivoère dins nos poéyis.

Y n'o equ chés cornailles à noèrtes pleumes qu'ales s'anichent in heut d'chés tours ed l'abbatiale Sint Pierre ed Corbie pi qu'à m'sure ales annonchent chés timpêtes pi chés malheurs.

Pétète que ch'gayant il est coère à dazer dins s'muche ?

Traduction réalisée par Tiodave de l'association OZYVO (<http://ozyvo.site.voila.fr/>)